



ՀԵԼՍԻՆԿՅԱՆ ՔԱՂԱՔԱՑԻԱԿԱՆ ԱՍԱՄԲԼԵԱՅԻՆ  
ՎԱՆԱԶՈՐԻ ԳՐԱՍԵՆՅԱԿ



## ՏԵՂԵԿԱՆՔ

ՀՔԱ ՎԱՆԱԶՈՐԻ ԳՐԱՍԵՆՅԱԿԻ ԿՈՂՄԻՑ 2023 ԹՎԱԿԱՆԻ ԱՄԱՌԱՅԻՆ  
ԶՈՐԱԿՈՉԻ ԺԱՄԱՆԱԿ ԱՐՁԱՆԱԳՐՎԱԾ ԽՆԴԻՐՆԵՐԻ ՎԵՐԱԲԵՐՅԱԼ

ՎԱՆԱԶՈՐ

2023

Հեղինակներ՝ Նազելի Մովսեսյան  
Անուշ Պետրոսյան  
Խմբագիր՝ Արթուր Սաքունց

Սույն տեղեկանքի թողարկումը հնարավոր է դարձել Ժողովրդավարության զարգացման հիմնադրամի և Ժողովրդավարության ազգային հիմնադրամի օժանդակության շնորհիվ:

Տեղեկանքում տեղ գտած տեսակետները և վերլուծությունները արտահայտում են հեղինակների կարծիքը և կարող են չհամընկնել Ժողովրդավարության զարգացման հիմնադրամի և Ժողովրդավարության ազգային հիմնադրամի տեսակետների և դիրքորոշումների հետ:



## ՆԱԽԱԲԱՆ

2023 թվականի ապրիլի 13-ին ՀՀ Կառավարության որոշմամբ ապրիլի 17-ից մինչև հուլիսի 31-ը հայտարարվեց շարքային կազմի պարտադիր զինվորական ծառայության 2023 թվականի ամառային գորակոչը<sup>1</sup>:

2023 թվականի ամառային գորակոչի շրջանակներում զինված ուժերի համալրումը շարքային կազմի պարտադիր զինվորական ծառայության կամ այլընտրանքային զինվորական ծառայության ենթակա քաղաքացիներով իրականացվեց 2023 թվականի հունիսի 26-ից մինչև հուլիսի 31-ը ներառյալ:

ՀՔԱ Վանաձորի գրասենյակը, (այսուհետ նաև՝ Կազմակերպություն) շարունակելով իր գործունեությունը գորակոչիկների իրավունքների պաշտպանության ուղղությամբ, դիտարկելով 2023 թ. ամառային գորակոչի իրականացման ընթացքը, արձանագրել է խնդիրներ, որոնք ներկայացրել են Կազմակերպություն դիմած **գորակոչիկները**, ինչպես նաև **զինվորական հաշվառման ենթակա անձինք**<sup>2</sup> 2023 թ. փետրվարի 1-ից մինչև հուլիսի 31-ը ժամանակահատվածում:

Հաշվի առնելով նաև այն հանգամանքը, որ 2021 թվականից սկսած Հայաստանի Հանրապետությունում պարբերաբար իրականացվում են վարժական հավաքներ, որոնց ընթացքում ևս արձանագրվում են խնդիրներ, սույն տեղեկանքում ներկայացվում են նաև դիտարկվող նույն ժամանակահատվածում Կազմակերպությանը դիմած **պահեստագործում հաշվառված անձանց** կողմից արձանագրված խնդիրները:

**2023 թվականի ամառային գորակոչի ընթացքում Կազմակերպություն է դիմել 66 գորակոչիկ, 6 զինվորական հաշվառման ենթակա անձ և 49 պահեստագործում հաշվառված անձ:**

<sup>1</sup> <https://www.arlis.am/documentview.aspx?docID=176450>



2023 թ. ԱՄԱՌԱՅԻՆ ԶՈՐԱԿՈՉՆ ԸՆԴԳՐԿՈՂ ԺԱՄԱՆԱԿԱՀԱՏՎԱԾՈՒՄ ՀՔԱ  
 ՎԱՆԱԶՈՐԻ ԳՐԱՍԵՆՅԱԿ ԴԻՄԱԾ ԶԻՆՎՈՐԱԿԱՆ ՀԱՇՎԱՌՄԱՆ ԵՆԹԱԿԱ,  
 ՊԱՀԵՍՏԱԶՈՐՈՒՄ ՀԱՇՎԱՌՎԱԾ ԱՆՁԱՆՑ ԵՎ ԶՈՐԱԿՈՉԿՆԵՐԻ ԽՆԴԻՐՆԵՐԻ ԱՄՓՈՓ  
 ՊԱՏԿԵՐԸ

Զինվորական հաշվառման ենթակա 6 անձանցից.

- 4 հոգի դիմել է առողջական խնդրով պայմանավորված զինվորական ծառայության ենթակա լինելու մասին խորհրդատվություն ստանալու նպատակով,
- 2 հոգի դիմել է պարտադիր զինվորական ծառայությունից տարկետման իրավունքի վերաբերյալ խորհրդատվություն ստանալու նպատակով (1-ը՝ ուսման հիմքով, 1-ը՝ ընտանեկան պայմաններից ելնելով):

Պահեստագործում հաշվառված 49 անձինք դիմել են հետևյալ խնդիրներով՝

- 20 հոգի՝ առողջական խնդիրների առկայության պայմաններում վարժական հավաքների կանչվելու իրավաչափության մասին խորհրդատվություն ստանալու նպատակով,
- 7 հոգի՝ վարժական հավաքներին կանչվելու իրավաչափության վերաբերյալ խորհրդատվություն ստանալու նպատակով,
- 5 հոգի՝ աշխատանքով պայմանավորված վարժական հավաքներին մասնակցության ժամանակահատվածը փոխելու հնարավորության վերաբերյալ խորհրդատվություն ստանալու նպատակով,
- 5 հոգի՝ ընտանեկան պայմաններից ելնելով վարժական հավաքներին կանչվելու իրավաչափության վերաբերյալ,
- 4 հոգի՝ վարժական հավաքներից խուսափելու իրավական հետևանքների վերաբերյալ խորհրդատվություն ստանալու նպատակով,



- 2 հոգի՝ ուսման հիմքով վարժական հավաքների մասնակցության ժամանակահատվածը փոխելու վերաբերյալ խորհրդատվություն ստանալու նպատակով,
- 2 հոգի՝ վարժական հավաքներին մասնակցության ծանուցման կարգի և դրանց չներկայանալու դեպքում իրավական հետևանքների վերաբերյալ խորհրդատվություն ստանալու նպատակով,
- 1 հոգի՝ վարժական հավաքներին մասնակցության պայմաններում աշխատավարձի փոխհատուցման վերաբերյալ խորհրդատվություն ստանալու նպատակով,
- 1 հոգի՝ վարժական հավաքներին որպես բժիշկ մասնակցելու հնարավորության վերաբերյալ խորհրդատվություն ստանալու նպատակով,
- 1 հոգի՝ անձի քաղաքացիությամբ պայմանավորված վարժական հավաքներին մասնակցելու պարտավորության վերաբերյալ խորհրդատվություն ստանալու նպատակով,
- 1 հոգի՝ վարժական հավաքների ենթակա պահեստազորում հաշվառված անձանցից ներկայացվող փաստաթղթերի պահանջի իրավաչափության վերաբերյալ խորհրդատվություն ստանալու նպատակով:

#### 66 գորակոչիկներից՝

- 55 հոգի դիմել է առողջական խնդիրների առկայությամբ զինվորական ծառայությանը իր պիտանիության վերաբերյալ խորհրդատվություն ստանալու նպատակով: Վերջինն Ես ահագանգել են նաև գորակոչի շրջանակներում իրականացված առողջական վիճակի հետազոտությունների արդյունքների չտրամադրման մասին,
- 2 հոգի ահագանգել են գորակոչի շրջանակներում իրականացված առողջական վիճակի հետազոտությունների արդյունքների չտրամադրման մասին,
- 2 հոգի դիմել է ԼԳԲՏ համայնքի անձանց զինապարտության վերաբերյալ խորհրդատվություն ստանալու նպատակով,



- 1 հոգի դիմել է արտերկրում ոչ ֆորմալ կրթություն ստանալու նպատակով անձնագրում ելքի թույլտվության ժամկետի երկարաձգման հնարավորության վերաբերյալ հարցով,
- 1 հոգի դիմել է եղբայրների միաժամանակ ծառայության անցնելու հնարավորության վերաբերյալ խորհրդատվություն ստանալու նպատակով,
- 1 հոգի դիմել է այլընտրանքային ծառայության անցնելու կարգի վերաբերյալ խորհրդատվություն ստանալու նպատակով,
- 1 հոգի դիմել է կցագրման ընթացակարգի վերաբերյալ խորհրդատվություն ստանալու նպատակով,
- 1 հոգի դիմել է ՀՀ կառավարության 2018 թ. N 404-Ն որոշման մեջ կատարված միջարք փոփոխությունների վերաբերյալ տեղեկություն ստանալու հարցով,
- 1 հոգի դիմել է պարտադիր զինվորական ծառայության գորակոչված քաղաքացիների ծառայության վայրերի նշանակման մասին հրամանի դրույթների վերաբերյալ խորհրդատվություն ստանալու նպատակով,
- 1 հոգի դիմել է «Պաշտպան հայրենյաց» ծրագրով զինվորական ծառայության անցնելու պայմանների վերաբերյալ խորհրդատվություն ստանալու նպատակով,
- 1 հոգի դիմել է որպես մարտական գործողությունների ժամանակ զոհված անձի եղբայր՝ իր զինապարտության վերաբերյալ խորհրդատվություն ստանալու նպատակով,
- 1 հոգի դիմել է խորհրդատվություն ստանալու այն մասին, թե արդյոք **միակողմանի ծնողագուրկ գորակոչիկները** կարող են օրենքով սահմանված կարգով օգտվել որևէ արտոնությունից՝ զինվորական ծառայության վայրերի նշանակման տեսանկյունից,
- 1 հոգի դիմել է սահմանված կարգի խախտմամբ զինվորական ծառայություն չանցած քաղաքացիների զինապարտության վերաբերյալ խորհրդատվություն ստանալու նպատակով:



2023 թ. ամառային գորակոչի ընթացքում երբեմն մեկ գորակոչիկ դիմել է մի քանի խնդրով, այդ պատճառով արձանագրված խնդիրների թիվը գերազանցում է Կազմակերպությանը դիմած գորակոչիկների թվին:

**2023 ԹՎԱԿԱՆԻ ԱՄԱՌԱՅԻՆ ԶՈՐԱԿՈՉԻ ԸՆԹԱՑՔՈՒՄ ԴԻՄԱԾ ԱՆՁԱՆՑ  
ԽՆԴԻՐՆԵՐՈՎ ՏՐԱՄԱԴՐՎԱԾ ԻՐԱՎԱԿԱՆ ԱՋԱԿՑՈՒԹՅԱՆ ԱՐԴՅՈՒՆՔՆԵՐԸ**

Կազմակերպությանը դիմած **66** գորակոչիկներից.

- 2 հոգի ճանաչվել է ոչ պիտանի զինվորական ծառայության համար,
- 2 հոգի ճանաչվել է ժամանակավորապես ոչ պիտանի զինվորական ծառայության համար,
- 5 հոգու տրամադրվել է տարկետում զինվորական ծառայությունից մինչև 1 տարի ժամկետով (5 ամիս, 6 ամիս կամ 10 ամիս),
- 2 հոգու վերաբերյալ կայացված կենտրոնական բժշկական հանջնաժողովի (ԿԲՀ) եզրակացության բողոքարկման արդյունքում որոշում է կայացվել վերջիններիս ներկայացնել հաջորդ` 2023 թ. ձմեռային գորակոչին:
- 1 հոգու անձնագրում երկարաձգվել է արտերկրում գտնվելու թույլտվության ժամկետը` ոչ ֆորմալ կրթությունն ավարտելու նպատակով,
- 11 հոգի` չհամաձայնելով առողջական վիճակի հետազոտությունների արդյունքների հետ, բողոքարկել է զինվորական ծառայությանը պիտանիության մասին ԿԲՀ եզրակացությունը:

Ըստ աշխարհագրական տարածքների Կազմակերպությունը դիմած գորակոչիկների, զինվորական հաշվառման ենթակա և վարժական հավաքներին կանչված պահեստագործում հաշվառված անձանց թիվը ներկայացված է աղյուսակ 1-ում:

*Աղյուսակ 1. 2023 թ. ամառային գորակոչին դիմած անձանց թիվն ըստ աշխարհագրական տարածքների*



Դիմած անձանց բանկության վայրերն ըստ մարզերի	Զորակոչիկ	Զինվորակա նհաշվառմա ն ենթակա անձ	Պահեստագործում հաշվառված անձ	Ընդամենը
Լոռի	35	5	3	43
Երևան	7	1	13	21
Շիրակ	7			7
Կոտայք	3		3	6
Արմավիր	1		2	3
Տավուշ	1		1	2
Գեղարքունիք	1			1
Արարատի մարզ	1			1
Սյունիք			1	1
Արագածոտն			1	1
Արտերկիր	2			2
չի հայտնել	8		25	33
Ընդամենը	66	6	49	121

2023 թ. ամառային զորակոչին առավել մեծ թվով զորակոչիկներ, զինվորական հաշվառման ենթակա և պահեստագործում հաշվառված անձինք դիմել են Լոռու մարզից (35,





5 և 3 համապատասխանաբար), Շիրակի մարզից (7 գորակոչիկ) և Երևան քաղաքից (7, 1 և 13 համապատասխանաբար):

Համեմատության համար նշենք, որ 2022 թվականի ամառային գորակոչի ընթացքում Կազմակերպությանը դիմել էր 31 գորակոչիկ, զինվորական հաշվառման ենթակա 3 և պահեստագործում հաշվառված 8 անձ:

***2023 թվականի ամառային գորակոչի ընթացքում Կազմակերպությանը դիմած գորակոչիկների թիվն ավելացել է ավելի քան կրկնակի անգամ, զինվորական հաշվառման ենթակա անձանց թիվը կրկնապատկվել է, իսկ պահեստագործում հաշվառված քաղաքացիների թիվն ավելացել է ավելի քան 6 անգամ:***

Համեմատության համար նշենք նաև, որ 2021 թ. ձմեռային, 2022 թ. ամառային և 2022 թ. ձմեռային գորակոչերի ընթացքում Կազմակերպությանը դիմած գորակոչիկների թիվը միասին կազմել է 70 անձ (համապատասխանաբար 14, 31 և 25 գորակոչիկ), իսկ միայն 2023 թ. ամառային գորակոչին, ինչպես արդեն նշվեց, դիմել է 66 գորակոչիկ:

Զորակոչիկների դիմելիության բարձր ցուցանիշը 2023 թ. ամառային գորակոչին պայմանավորված է մի շարք հանգամանքներով, որոնցից գլխավորը ՀՀ կառավարության 2018 թվականի ապրիլի 12-ի N 404-ն որոշման մեջ կատարված փոփոխություններ են:

**ԶՈՐԱԿՈՉԻ ԻՐԱԿԱՆԱՑՄԱՆ ՎԵՐԱԲԵՐՅԱԼ ԻՐԱՎԱԿԱՆ  
ԿԱՐԳԱՎՈՐՈՒՄՆԵՐՈՒՄ ԿԱՏԱՐՎԱԾ ՓՈՓՈԽՈՒԹՅՈՒՆՆԵՐԻ**

**ԱՄՓՈՓ ԳՆԱՀԱՏԱԿԱՆԸ**

2022 թ. դեկտեմբերի 22-ին ՀՀ կառավարության կողմից ընդունվեց «Հայաստանի Հանրապետության կառավարության 2018 թվականի ապրիլի 12-ի N 404-ն որոշման մեջ



փոփոխություններ կատարելու մասին» N 2053-Ն<sup>2</sup> որոշումը, որն ուժի մեջ մտավ 2023 թվականի փետրվարի 1-ին:

Ինչպես ներկայացրել ենք «2021 թ. ձմեռային, 2022 թ. ամառային և 2022 թ. ձմեռային գորակոչերի ընթացքում գորակոչիկների իրավունքների վիճակի մասին» զեկույցում<sup>3</sup>, ՀՀ կառավարության 2018 թվականի ապրիլի 12-ի N 404-Ն որոշման մեջ կատարված փոփոխություններով ներդրվեցին չափելիության նոր ու ժամանակակից սանդղակներ:

Կազմակերպության՝ տարիների ջանքերի, ջատագովության արդյունքում 2023 թ. ուժի մեջ մտած փոփոխություններով՝ Կառավարության 2018 թ. N 404-Ն որոշմամբ սահմանված ախտորոշումները համապատասխանեցվեցին Հիվանդությունների միջազգային դասակարգման 10-րդ վերանայմանը<sup>4</sup> (2019):

Նշենք, որ դեռևս 2019 թվականից սկսած ՀՔԱ Վանաձորի գրասենյակը առաջարկում էր<sup>5</sup> ՀՀ կառավարության 2018 թ. N 404-Ն որոշմամբ սահմանվող հիվանդությունները համապատասխանեցնել Հիվանդությունների միջազգային 10-րդ դասակարգմանը: Այդ նպատակով Կազմակերպությունը բազմիցս հանդիպումներ է ունեցել շահագրգիռ պետական մարմինների ներկայացուցիչների հետ՝ ընդգծելով խնդրի կարևորությունը:

Չնայած ՀՀ կառավարության 2018 թ. ապրիլի 12-ի N 404-Ն որոշման մեջ իրականացրած փոփոխությունները դրական են, այնուամենայնիվ փորձաքննության իրականացման կարգի, առանձին հիվանդությունների ախտորոշման չափորոշիչների հետ կապված մնացել են խնդիրներ, որոնց վերաբերյալ Կազմակերպությունը մշակել է առաջարկություններ և դրանք ներկայացրել ՀՀ պաշտպանության նախարարությանը: Ցավոք, դրանց մեծ մասը չի ընդունվել ՀՀ պաշտպանության նախարարության կողմից տարբեր պատճառաբանությամբ:

<sup>2</sup> <https://www.arlis.am/DocumentView.aspx?docid=172242>

<sup>3</sup> <https://hcav.am/hcav-am-report-03-04-2023/>

<sup>4</sup> <https://icd.who.int/browse10/2019/en#/F20-F29>

<sup>5</sup> [https://drive.google.com/file/d/1Alf5ou27JMQbMWLlwk5\\_0G11-9fluz3M/view?pli=1](https://drive.google.com/file/d/1Alf5ou27JMQbMWLlwk5_0G11-9fluz3M/view?pli=1)



Ամփոփելով ՀՀ կառավարության 2018 թ. N 404-Ն որոշման մեջ 2022 թվականի դեկտեմբերի 22-ին կատարված և 2023 թ փետրվարի 1-ին ուժի մեջ մտած փոփոխությունները, կարող ենք արձանագրել, որ դրանք դրական են այն իմաստով, որ.

- բոլոր հիվանդությունների դասակարգումները համապատասխանեցված են ներկայումս գործող Հիվանդությունների միջազգային դասակարգման տասներորդ վերանայման դասակարգումներին,
- ըստ կարգավիճակի՝ անձանց փորձաքննության սյունակներն այժմ առավել հստակ են դասակարգված (ըստ առանձին խմբերի),
- որոշ դեպքերում, ի տարբերություն նախկինում գործող կարգավորման, պիտանիության աստիճանը որոշող դրույթներում հաշվի է առնվում գորակոչիկի կամ զինձառայողի առողջական վիճակը:

Օրինակ՝ 9-րդ հոդվածի «Հոգեկան և վարքային խանգարում-ներ հոգեակտիվ նյութերի գործածման հետևանքով» «բ» կետը՝ «սուր պսիխոտիկ խանգարումներ՝ անձի չափավոր կամ թեթև արտահայտված փոփոխություններով, կախվածության համախտանիշ, դադարեցման վիճակներ և այլ բարդություններ, վնասակար հետևանքներ (սոմատիկ և հոգեկան)՝ հոգեակտիվ նյութերի գործածման հետևանքով» նախկինում գորակոչիկների համար նախատեսում էր տարկետում մինչև մեկ ատրի ժամկետով («կարիք ունի բուժման»), իսկ այժմ սահմանում է, որ գորակոչիկը «Ժամանակավորապես ոչ պիտանի է զինձառայության համար»:

19-րդ հոդվածի՝ «Քրոնիկ վարակային հիվանդություններ» «ա» կետը նախկինում սահմանում էր, որ «գորակոչիկը ժամանակավորապես ոչ պիտանի է զինձառայության համար», իսկ այժմ «գորակոչիկը ոչ պիտանի է զինձառայության համար»:

57-րդ հոդվածի՝ «Ամորձու թաղանթների և սերմնալարի ջրգողություն» «ա» կետը՝ «Իստ արտահայտված, քայքայող դժվարացնող» նախկինում գորակոչիկների համար սահմանում էր տարկետում մինչև 1 տարի ժամկետով («կարիք ունի բուժման»), իսկ



զինձառայողների դեպքում՝ ծառայողական պարտականություններից մասնակի ազատման՝ մինչև 15 օր ժամկետով կամ արձակուրդ հիվանդության պատճառով (վերականգնողական), իսկ այժմ գորակոչիկների համար սահմանում է զինձառայությանը ժամանակավորապես ոչ պիտանիություն, իսկ զինձառայողների համար՝ ոչ պիտանիություն:

Մինևույն ժամանակ, ՀՀ կառավարության 2018 թ. N 404-Ն որոշման մեջ, չնայած կատարված փոփոխություններին, առկա թերությունները և անհստակությունները մնացել են անփոփոխ:

- սահմանված չեն հստակ ժամկետներ՝ ժամանակ ենթադրող («ձգձգվող») և հիվանդության բուժման բարդություն ենթադրող («բուժմանը դժվար ենթարկվող») որոշ ձևակերպումների համար: Մինչ ՀՀ կառավարության 2018 թ. N 404-Ն որոշման մեջ նոր փոփոխությունների ուժի մեջ մտնելը, ՀՔԱ Վանաձորի գրասենյակն առաջարկել էր հստակեցնել «ձգձգվող» կամ «բուժմանը դժվար ենթարկվող» հասկացությունները և սահմանել կոնկրետ ժամկետներ կամ ժամանակահատվածներ ըստ յուրաքանչյուր հիվանդության՝ ելնելով հիվանդության ախտորոշման համար անհրաժեշտ ժամանակից: Առաջարկությունը չի ընդունվել ՀՀ ՊՆ կողմից այն պատճառաբանությամբ, որ բուժման գործընթացում յուրաքանչյուր հիվանդության բուժման և ելքի համար գործնականում հնարավոր չէ որևէ ժամկետ սահմանել:
- հստակեցված չեն որոշ հոդվածների սահմանումներն ու որոշ առողջական խնդիրների դեպքում փորձաքննության կարգը:

Օրինակ՝ ՀՀ կառավարության 2018 թ. N 404-Ն որոշման 78-րդ հոդվածով սահմանվում է, որ աչքի ծակող-թափանցող վնասվածքների կապակցությամբ վիրահատության ենթարկված գորակոչիկները լիարժեք բուժումից և վերականգնումից



հետո ճանաչվում են սահմանափակումով պիտանի զինվորական ծառայության համար, անկախ տեսողության սրությունից և կիրառվում է 85-րդ հոդվածի «գ» կետը: Տվյալ հոդվածն անհասկանալի է այն առումով, որ այն դեպքերում, երբ վնասվածքից հետո անձը ստացել է լիարժեք բուժում, սակայն, տեսողության սրությունը տուժել է, ապա անհասկանալի է, թե ըստ որ հոդվածի է փորձաքննվում, այն դեպքում, երբ 78-րդ հոդվածը բացառում է տեսողության սրությամբ փորձաքննումը, և փորձաքննությունը սահմանվում է ըստ 85-րդ հոդվածի: Մինչ որոշման նոր փոփոխությունների ուժի մեջ մտնելը, ՀՔԱ Վանաձորի գրասենյակն առաջարկել էր հստակեցնել հոդվածը: Առաջարկությունը չի ընդունվել ՀՀ ՊՆ կողմից այն պատճառաբանությամբ, որ անհրաժեշտ է 78-րդ և 85-րդ հոդվածների «գ» կետերի սահմանափակումների կիրառումը՝ հավելելով, որ նույնիսկ հնարավոր բարձր տեսողության սրությունը մթնշաղային և գիշերային ժամերին զգալի տուժում է, որը, ըստ ՀՀ ՊՆ-ի, հիմնավոր է դարձնում 85-րդ հոդվածի «գ» կետի կիրառումը:

«Գործառույթային բնույթի, առանց կլինիկական դրսևորումների, անցողիկ, եզակի նախասիրտ-փորոքային հաղորդչականության I-II աստիճանի մասնակի պաշարումները և սինո-աթրիալ II աստիճանի մասնակի պաշարումները փորձաքննվում են ՀՀ կառավարության 2018 թ. N 404-Ն որոշման 26-րդ հոդվածի «դ» կետով: Սակայն մինչ որոշման նոր փոփոխությունների ուժի մեջ մտնելը, ՀՔԱ Վանաձորի գրասենյակն առաջարկել էր վերանայել այս հոդվածը, քանի որ II աստիճանի պաշարումը չի կարող լինել մասնակի և անցողիկ: Անցողիկ, եզակի առաջին աստիճանի պաշարումը կարող է լինել ֆիզիոլոգիական՝ դեռահաս, երիտասարդ տարիքում: Առաջարկությունը չի ընդունվել ՀՀ ՊՆ կողմից այն պատճառաբանությամբ, որ «II աստիճանի պաշարումը իհարկե չի կարող լինել մասնակի, բայց կարող է լինել անցողիկ: Առաջին աստիճանի պաշարումը կարող է լինել ֆիզիոլոգիական՝ դեռահաս, երիտասարդ տարիքում», որն ընդգրկված է որոշման մեջ և ձևակերպված է որպես «Գործառույթային բնույթի, առանց կլինիկական դրսևորումների անցողիկ, եզակի առաջին աստիճանի պաշարումներ», որը, ըստ ՀՀ ՊՆ-ի, ավելի



մանրամասն է ներկայացնում և թույլ է տալիս տարբերակել վերը նշված պաշարումների ֆիզիոլոգիական կամ պաթոլոգիկ լինելը:

- քանի որ ՀՀ կառավարության 2018 թ. ապրիլի 12-ի N 404-Ն որոշմամբ սահմանված չէ սեզոնային հիվանդությունները (ալերգիա, անոթային հիվանդություններ և այլն) համապատասխան եղանակային պայմաններում փորձաքննելու դրույթը, գործնականում ևս հաշվի չեն առնվում դրանց բնույթն ու առանձնահատկությունները. չի սահմանվում հետազոտությունների ու փորձաքննությունների կազմակերպումը միայն համապատասխան եղանակային պայմաններում: Որպես կանոն, այն զորակոչիկները, ովքեր փորձաքննվում են իրենց սեզոնային հիվանդությունների դրսևորման ոչ ակնառու եղանակային պայմաններում և ճանաչվում են պիտանի զինվորական ծառայության համար, համապատասխան եղանակային պայմաններում փորձաքննվելու դեպքում տարկետում են ստանում:

Զորակոչիկներին իրենց առողջական խնդիրների դրսևորման համապատասխան եղանակային պայմաններում չփորձաքննելու արդյունքում անհնար է ստանալ օբյեկտիվ ախտորոշում, որի հետևանքով զորակոչիկները չեն համաձայվում իրենց առողջական վիճակի հետազոտությունների արդյունքների հետ:

**ՀՀ կառավարության 2018 թ. N 404-Ն որոշման մեջ կատարված փոփոխությունների ուսումնասիրության ընթացքում արձանագրվել է նաև հետընթաց.**

- որոշ հիվանդությունների դեպքում զինվորական ծառայության պիտանիության աստիճանը որոշող դրույթներում կատարված փոփոխություններով հաշվի չի առնվում առողջական խնդիրների ծանրության աստիճանը:

Օրինակ՝ ՀՀ կառավարության 2018 թ. N 404-Ն որոշման 42-րդ հոդվածի՝ «Ուտքերի մատների արատներ (M20)» «ա» կետում՝ «երկու ոտքի մատների բացակայություն կամ սերտաճում» կատարվել է լրացում «առաջին մատի բացակայություն»: Նույն հոդվածում



փոխվել է «բ» կետը՝ նախկինում «քայլքը և կոշիկ կրելը չափավոր դժվարացնող՝ ոտքի մատների բացակայություն, անշարժություն, ծովածություն կամ սերտաճում», այժմ ձևակերպվել է՝ «քայլքի և կոշիկ կրելու զգալի արտահայտված խանգարումով»: Նույն հոդվածի «գ» կետը՝ «քայլքի և կոշիկ կրելու չափավոր արտահայտված խանգարումով» նախկինում սահմանում էր գորակոչիկների ոչ պիտանիություն զինվորական ծառայության համար, իսկ այժմ նույն ախտորոշմամբ գորակոչիկները և զինծառայողները սահմանափակումով պիտանի են ճանաչվում զինվորական ծառայության համար):

- **որոշ հիվանդությունների դեպքում ֆունկցիայի խանգարման գնահատման հստակ չափորոշիչները և հիվանդության հետազոտության հստակ մեխանիզմները հանվել են:**

Օրինակ՝ ՀՀ կառավարության 2018 թ. N 404-Ն որոշման 48-րդ հոդվածը մինչև 2023 թ. փետրվարի 1-ին փոփոխությունների ուժի մեջ մտնելը, ներառում էր «անգիոտրոֆոներոզ» եզրույթը (վերջույթների անոթների արյան շրջանառության խանգարում), որն ուներ ֆունկցիայի խանգարման գնահատման հստակ չափորոշիչներ և հիվանդության հետազոտության հստակ մեխանիզմ, այն է՝ կատարվում էր մատնային զարկերակների դոպլեր հետազոտություն՝ **ցրտային փորձով՝ նշելով վերականգնման ժամանակը (աննշան խանգարման ժամանակ՝ վերականգնման ժամանակը 4-ից մինչև 6 րոպե, չափավոր խանգարման ժամանակ՝ 6-ից մինչև 8 րոպե, զգալի՝ 8 և ավելի րոպե):** Ներկայումս փորձաքննության իրականացման նման մեխանիզմ չկա: Ավելին, ՀՀ կառավարության 2018 թ. ապրիլի 12-ի 404-Ն որոշման 48-րդ հոդվածը «անգիոտրոֆոներոզ» ախտորոշում չի ներառում, փոխարենը, որոշման փոփոխության համաձայն, անոթների արյան շրջանառության խանգարման հետազոտությունը կատարվում է դուպլեքս սկանավորման, կոնտրաստային մուլտիսպիրալ ՀՇ-անգիոգրաֆիայի, ուղղակի անգիոգրաֆիայի, ՄՌՇ անգիոգրաֆիայի միջոցով:



Ի դեպ 2023 թ. ամառային գորակոչի ընթացքում առողջական խնդրով Կազմակերպություն դիմած գորակոչիկներից 18 %-ի (10 գորակոչիկի) խնդիրը կապված էր հենց անոթների հետ (անգիոտրոֆոներոզ), և վերջիններս Կազմակերպությանը հայտնել են, որ թվարկված հետազոտության մեթոդներից գործնականում իրականացվում է դուպլեքս սկանավորումը:

Նշենք, որ ՀՀ կառավարության 2018 թ. ապրիլի 12-ի N 404-Ն որոշման նախկինում գործող կարգավորման շրջանակներում փորձաքննված և տարկետում ստացած գորակոչիկներն այժմ նույն ախտորոշմամբ ճանաչվում են պիտանի զինվորական ծառայության համար, չնայած այն հանգամաքին, որ վերջիններիս առողջական վիճակում որևէ փոփոխություն չի արձանագրվել: Կազմակերպության կողմից բազմիցս ներկայացված առաջարկությունը՝ սեզոնային հիվանդությունների դեպքում գորակոչիկներին պարտադիր կարգով փորձաքննել համապատասխան եղանակային պայմաններում, դեռևս չի ընդունվել: Հատկանշական է նաև այն, որ չնայած 404-Ն որոշման 48-րդ հոդվածը «անգիոտրոֆոներոզ» ախտորոշում չի ներառում, սակայն 2023 թ. ամառային գորակոչին ՀՀ ՊՆ գորակոչային և գորահավաքային համալրման ծառայության բժշկական հանձնաժողովները շարունակում են գորակոչիկների բժշկական հետազոտությունների արդյունքում նշել հենց «անգիոտրոֆոներոզ» կամ «անգիոներոզ» ախտորոշումը: **Այն հայտ է, որ ՀՀ առողջապահության նախարարության որոշ բժշկական հաստատությունների աշխատակիցներին պատշաճ չեն տեղեկացրել Կառավարության որոշման մեջ կատարված փոփոխությունների մասին:**

- **ՀՀ կառավարության 2018 թ. N 404-Ն որոշման բացատրական մասում որոշ հոդվածների փորձաքննության կարգը հակասում է նույն որոշման հավելված 1-ում իմպերատիվ կերպով գործող դրույթին:**

Օրինակ՝ ներկայումս ՀՀ կառավարության 2018 թվականի ապրիլի 12-ի N 404-Ն որոշման Հավելված N 1-ի ցանկի գործող կարգավորմամբ՝ միակ ամորձու առկայության





դեպքում անձանց փորձաքննելու մասին նշվում է միայն 58-րդ հոդվածի «ա» կետում, մասնավորապես՝ «ա) երկու ամորձու տեղակայում որովայնի խոռոչում կամ բացակայությունը, միակ ամորձի» և նախատեսվում է, որ I, II, IV, V, VI սյունակներով փորձաքննվող անձինք ճանաչվում են ոչ պիտանի զինվորական ծառայության համար: Մինչդեռ 58-րդ հոդվածով փորձաքննվողների վերաբերյալ նշվում է 56-րդ հոդվածի բացատրական մասում, որտեղ սահմանվում է, որ «չորրորդ և հինգերորդ սյունակների համար կիրառվում է 58 հոդվածի «գ» կետը», այսինքն՝ անձինք պիտանի են զինվորական ծառայության համար: Ընդգծենք, որ ՀՀ կառավարության 2018 թվականի ապրիլի 12-ի N 404-Ն որոշման Հավելված 1-ը իմպերատիվ կերպով սահմանում է, որ միակ ամորձու դեպքում անձինք, այդ թվում նաև չորրորդ և հինգերորդ սյունակներով փորձաքննվողները պետք է փորձաքննվեն միայն 58-րդ հոդվածի «ա» կետով և ոչ թե «գ» կետով: Կազմակերպությունն առաջարկել է՝ 56-րդ հոդվածի «ա» կետի բացատրական մասի 8-րդ կետում «8) միակ ամորձի՝ (կիրառվում է 58 հոդվածի «ա» կետը» բառերից հետո հանել «չորրորդ և հինգերորդ սյունակների համար կիրառվում է 58 հոդվածի «գ» կետը» բառերը):

2022 թ. դեկտեմբրի 22-ին ՀՀ կառավարությունն ընդունեց որոշում ՀՀ կառավարության 2018 թվականի ապրիլի 12-ի N 405-Ն որոշման մեջ փոփոխություններ և լրացում կատարելու մասին:

**Որոշմամբ կատարված փոփոխությունները դրական են այն իմաստով, որ.**

- սահմանում են պահեստագործում հաշվառված քաղաքացիների բժշկական հետազոտությունների ցանկը,
- անձի կողմից իր առողջական վիճակի վերաբերյալ տվյալները քաղաքացուն կարող են հասանելի լինել նաև էլեկտրոնային առողջապահության ԱՐՄԵԴ համակարգի միջոցով:



Մինևույն ժամանակ, ՀՀ կառավարության 2018 թ. N 405-Ն որոշման մեջ, չնայած կատարված փոփոխություններին, առկա թերությունները և անհստակությունները մնացել են անփոփոխ.

- անձի մոտ 5 և ավելի հիվանդության առկայության դեպքում շեշտը դրվում է միայն հիվանդությունների քանակի վրա, նույն անձի մոտ գուրգահեռաբար մի քանի հիվանդության պարագայում հնարավոր ծանրաբեռնվածության և ընդհանուր առողջական վիճակի և հնարավոր վատթարացման հանգամանքը չի դիտարկվում,
- միաժամանակ մի քանի հիվանդության դեպքում չի սահմանվում անձի զինվորական ծառայությանը պիտանիությունը որոշելու իրավական հիմքերը. անձի մոտ առկա հիվանդությունները դիտարկում են մեկը մյուսից առանձին, չդիտարկելով անձի առողջական վիճակի ողջ պատկերը:

ՀՀ կառավարության 2018 թ. N 405-Ն որոշման մեջ կատարված փոփոխություններին ուսումնասիրության ընթացքում արձանագրվել է նաև հետընթաց.

- Կենտրոնական բժշկական հանձնաժողովի կազմում ընդգրկվում են նաև ՀՀ պաշտպանության նախարարության և Զորակոչային և զորահավաքային համալրման ծառայության ներկայացուցիչներ, որոնք նախկինում գործող որոշման հավելվածի համաձայն չէին ընդգրկվում ԿԲՀ-ի կազմում:

Նման փոփոխություն կատարելու անհրաժեշտությունը որևէ ձևով չի հիմնավորվել: Կատարված փոփոխությունը, ըստ կազմակերպության, չի կարող ապահովել ԿԲՀ-ի գործառնական օբյեկտիվությունը, հաշվի առնելով այն հանգամանքը, որ վերջինիս հիմնական գործառույթը զինապարտ քաղաքացիների առողջական վիճակի հետազոտության և բժշկական փորձաքննության կազմակերպումն է, մինչդեռ Զորակոչային և զորահավաքային համալրման ծառայության գործառույթը հիմնականում



զինված ուժերի համալրում է զինապարտ քաղաքացիներով: Հաշվի առնելով ԿԲՀ-ի դերն ու իրականացրած գործառույթների բնույթը՝ Կազմակերպություն գտնում է, որ նպատահարմար չէ վերջինիս կազմում ընդգրկել պաշտպանության ոլորտի քաղաքականություն իրականացնող մարմինների ներկայացուցիչների՝ գործընթացի կազմակերպմանը ներգրավելով միայն այդ համակարգից դուրս այլ մարմիններին ու դրանց ներկայացուցիչներին՝ խուսափելու համար շահերի բախումից: Կազմակերպությունն այս մասին առաջարկություն է ներկայացրել ՀՀ ՊՆ-ին, սակայն առաջարկությունը ՀՀ ՊՆ կողմից չի ընդունվել այն պատճառաբանությամբ, որ ԿԲՀ կազմում ՀՀ ՊՆ զորակոչային և զորահավաքային համալրման ծառայության ներկայացուցիչների ընդգրկումը պայմանավորված է հանձնաժողովի նիստերը պլանավորելու և ՀՀ ՊՆ ԶԶՀԾ համապատասխան տարածքային ստորաբաժանումներում կազմակերպելու, փորձաքննության ներկայացվող քաղաքացիների վերաբերյալ, անհրաժեշտության դեպքում տարածքային ստորաբաժանումներից լրացուցիչ տվյալներ և փաստաթղթեր ստանալու, ինչպես նաև պաշտպանության նախարարին կամ հանձնաժողովի նախագահին հասցեագրված դիմում բողոքները քննելու և համապատասխան ընթացք տալու աշխատանքները համակարգելու հանգամանքով:

***Ի դեպ, որոշ իրավական ակտերում շարունակվում է կիրառվել «Զինվորական կոմիսարիատ» և ոչ թե «Զորակոչային և զորահավաքային համալրման ծառայության տարածքային ստորաբաժանում» անվանումը:***

Փաստացի, 2023 թ. ամառային զորակոչն առաջինն էր, որն անցկացվեց ՀՀ կառավարության 2018 թ. ապրիլի 12-ի N 404-Ն և N 405-Ն որոշումներում կատարված վերը շարադրված փոփոխություններից հետո:

2023 թ. ամառային զորակոչի ընթացքում Կազմակերպություն դիմած զորակոչիկների, զինվորական հաշվառման ենթակա և պահեստազորում հաշվառված անձանց մեծ թիվը պայմանավորված է նաև այն համգամանքով, որ զորակոչիկները,



զինվորական հաշվառման ենթակա և պահեստագործում հաշվառված անձինք տեղեկացված չեն որոշումներով զորակոչի իրականացումը կարգավորող տարբեր իրավական ակտերի հոդվածների փոփոխությունների մասին:

Բացի այդ, 2023 թ. ամառային զորակոչի ընթացքում Կազմակերպությանը դիմած զորակոչիկների մի մասը, ովքեր նախորդ զորակոչին ստացել էին տարկետում, նշված զորակոչի շրջանակներում նույն առողջական խնդիրներով Կենտրոնական բժշկական հանձնաժողովի որոշումներով ճանաչվել էին պիտանի/ սահմանափակումով պիտանի զինվորական ծառայության համար, որի հետ անհամաձայնություն հայտնելով դիմել էին Կազմակերպությանը:

Ինչպես արձանագրել էինք «2021 թ. ձմեռային, 2022 թ. ամառային և 2022 թ. ձմեռային զորակոչերի ընթացքում զորակոչիկների իրավունքների վիճակի մասին» Կազմակերպության զեկույցում<sup>6</sup> քաղաքացիների շրջանում կա անվստահություն զորակոչի բժշկական հանձնաժողովների աշխատանքի օբյեկտիվության նկատմամբ:

**2023 ԹՎԱԿԱՆԻ ԱՄԱՌԱՅԻՆ ԶՈՐԱԿՈՉԻ ԸՆԹԱՑՔՈՒՄ ԱՐՁԱՆԱԳՐՎԱԾ  
 ՀԱՄԱԿԱՐԳԱՅԻՆ ԽՆԴԻՐՆԵՐԸ**

Ամփոփելով 2023 թ. ամառային զորակոչի ընթացքում ՀՔԱ Վանաձորի գրասենյակի արձանագրած խնդիրները՝ ՀՀ կառավարության 2018 թվականի N 404-Ն և 405-Ն որոշումներում 2022 թ դեկտեմբերի 22-ին կատարված և 2023 թ. փոտրվարի 1-ին ուժի մեջ մտած փոփոխությունների համատեքստում, արձանագրում ենք հետևյալ խնդիրները.

<sup>6</sup> <https://hcav.am/hcav-am-report-03-04-2023/>



### Օրենսդրական խնդիրներ

1. Որոշ հիվանդությունների դեպքում զինվորական ծառայության պիտանիության մասին որոշում կայացնելիս հաշվի չի առնվում առողջական խնդիրների ծանրության աստիճանը:
2. ՀՀ կառավարության 2018 թ. N 404-Ն որոշման բացատրական մասում որոշ հոդվածների փորձաքննության կարգը հակասում է նույն որոշման Հավելված 1-ում իմպերատիվ կերպով գործող դրույթին:
3. Անձի մոտ 5 և ավելի հիվանդության առկայության դեպքում շեշտը դրվում է միայն հիվանդությունների քանակի վրա, հետևաբար նույն անձի մոտ միաժամանակ մի քանի հիվանդության պարագայում նրա ընդհանուր առողջական վիճակը և հնարավոր վատթարացման հանգամանքը չի դիտարկվում:
4. Միաժամանակ մի քանի հիվանդության դեպքում օրենսդրական մակարդակով սահմանված չեն անձի զինվորական ծառայությանը պիտանիությունը որոշելու իրավական հիմքերը՝ անձի մոտ առկա հիվանդությունները դիտարկելով առանձին՝ մեկը մյուսից մեկուսի և ոչ թե դիտարկելով անձի առողջական վիճակի ողջ պատկերը,
5. ԿԲՀ կազմում ՀՀ պաշտպանության նախարարության և Զորակոչային և զորահավաքային համալրման ծառայության ներկայացուցիչներին ընդգրկելը նվազեցնում է վստահությունը ԿԲՀ-ի գործառնական օբյեկտիվության հանդեպ, հաշվի առնելով այն հանգամանքը, որ վերջինիս գործառույթը բժշկական հանձնաժողովների կողմից բժշկական փորձաքննություն անցած շարքային և պահեստագործի սպայական կազմերի պարտադիր զինվորական ծառայության գորակոչվողների զինվորական ծառայության պիտանիության վերաբերյալ եզրակացություն կայացնելն է, մինչդեռ Զորակոչային և զորահավաքային համալրման ծառայության հիմնական գործառույթը զինված ուժերի համալրում է զինապարտ քաղաքացիներով:



### Գործնականում առկա խնդիրներ

6. Չնայած ՀՀ կառավարության 2018 թ. N 404-Ն որոշման Հավելված 1-ում հիվանդությունների դասակարգումներն այժմ համապատասխանեցված են ներկայումս գործող Հիվանդությունների միջազգային դասակարգման տասներորդ վերանայման դասակարգումներին, սակայն գործնականում առկա են ախտորոշումների ձևակերպման խնդիրներ (օրինակ՝ «անգիոտրոֆոներոզ» հիվանդության ախտորոշում):
7. Պետության պարտավորությունն է գորակոչի շրջանակներում համապատասխան գործառույթ իրականացնող կառույցների աշխատակիցներին պատշաճ կարգով տեղեկացնել ՀՀ կառավարության որոշումներում կատարված փոփոխությունների մասին, մինչդեռ ՀՀ առողջապահության նախարարության որոշ բժշկական հաստատությունների աշխատակիցներին պատշաճ չեն տեղեկացրել ՀՀ Կառավարության 2018 թ. ապրիլի 12-ի N 404-Ն որոշման մեջ կատարված փոփոխությունների մասին, ինչի արդյունքում անձանց տրված ախտորոշումները չեն համապատասխանում նշված որոշմանը:
8. Քանի որ օրենսդրության մակարդակում՝ ՀՀ կառավարության 2018 թ. ապրիլի 12-ի N 404-Ն որոշմամբ, սահմանված չէ սեզոնային հիվանդությունները (ալերգիա, անոթային հիվանդություններ և այլն) համապատասխան եղանակային պայմաններում փորձաքննելու դրույթը, գործնականում ևս հաշվի չեն առնվում նման հիվանդությունների բնույթն ու առանձնահատկությունները. հետազոտություններն ու փորձաքննությունը չեն կազմակերպվում համապատասխան եղանակային պայմաններում, ինչը կարող է որոշիչ նշանակություն ունենալ զինվորական ծառայությանը գորակոչիկի պիտանիության մասին որոշման համար: *2023 թ. ամառային գորակոչին անոթային խնդիրներով դիմած գորակոչիկների (18 %) հետազոտություններն իրականացվել են այնպիսի եղանակային պայմաններում, երբ դրանք արտահայտված են նվազագույն չափով:*



9. Անտեսվում են գորակոչիկների առավել լուրջ առողջական խնդիրները և զինվորական ծառայությանը պիտանիության մասին որոշում կայացնելիս գորակոչային բժշկական հանձնաժողովները հիմնվում են առկա այլ առողջական խնդիրների վրա, որոնցով, հիմնականում, կայացվում է որոշում զինվորական ծառայությանը պիտանիության մասին:
10. Բժշկական հաստատությունները շարունակում են գորակոչիկներին չտրամադրել վերջիններիս առողջական վիճակի վերաբերյալ փաստաթղթերը, փոխարենը գորակոչիկներին հորդորում են նշված փաստաթղթերը ստանալ Զորակոչային և գորահավաքային համալրման ծառայության տարածքային ստորաբաժանումներից՝ դրանով իսկ խախտելով ՀՀ Կառավարության 2018 թվականի N 405-Ն որոշման 35-րդ հոդվածով սահմանված դրույթը: *(«Բժշկական կազմակերպությունը պարտավոր է քաղաքացուն կամ նրա օրինական ներկայացուցչին կամ նրա կողմից լիազորված անձին տրամադրել տեղեկություններ առողջական վիճակի, հետազոտությունների արդյունքների, հիվանդության ախտորոշման և բուժման մեթոդների, դրանց հետ կապված ռիսկի, բժշկական միջամտության հնարավոր տարբերակների, հետևանքների և բուժման արդյունքների մասին»): Ի դեպ, Կազմակերպություն դիմած գրեթե բոլոր գորակոչիկներն առնչվել են նշված խնդրի հետ:*
11. ՀՀ Կառավարության 2018 թվականի N 405-Ն որոշման 35-րդ հոդվածով սահմանված է նաև դրույթ այն մասին, որ *առողջական վիճակի, հետազոտությունների արդյունքների, հիվանդության ախտորոշման և բուժման մեթոդների, դրանց հետ կապված ռիսկի, բժշկական միջամտության հնարավոր տարբերակների, հետևանքների և բուժման արդյունքների մասի տվյալները քաղաքացուն կարող են հասանելի լինել նաև էլեկտրոնային առողջապահության ԱՐՄԵԴ համակարգի միջոցով, մինչդեռ 2023 թ. ամառային գորակոչին Կազմակերպություն դիմած գորակոչիկներից շատերը իրազեկված չեն ԱՐՄԵԴ համակարգից օգտվելու կարգի մասին:*



12. Ձորակոչային և գորահավաքային համալրման ծառայության տարածքային ստորաբաժանումների բժշկական հանձնաժողովը քաղաքացու առողջական վիճակի վերաբերյալ եզրակացությունները չի տրամադրում ակտի հասցեատիրոջը կամ տրամադրում է այն ժամանակ, երբ գորակոչիկը ժամանակ չի ունենում ծանոթանալու դրանց և մինչև գորակոչի ավարտը, անհրաժեշտության դեպքում կամ եզրակացության հետ համաձայն չլինելու դեպքում, բողոքարկելու իր վերաբերյալ կայացված որոշումը:
13. Ի տարբերություն նախորդ տարիների գորակոչերի<sup>7</sup>, երբ Ձորակոչային և գորահավաքային համալրման ծառայության տարածքային ստորաբաժանումների բժշկական հանձնաժողովները հաճախ հաշվի չէին առնում գորակոչիկների սեփական նախաձեռնությամբ և ֆինանսական միջոցներով իրականացրած հետազոտությունների արդյունքները, 2023 թ. ամառային գորակոչի ընթացքում Կազմակերպությանը դիմած գորակոչիկներն ահազանգում էին այն մասին, որ գորակոչիկների գանգատները համարելով ոչ հիմնավոր և ոչ բավարար, գորակոչային բժշկական հանձնաժողովները նրանց խորհուրդ են տալիս հետազոտություններ անցնել սեփական ֆինանսական միջոցներով և միայն դրանց արդյունքերը ուսումնասիրելով՝ որոշում նշված առողջական խնդրով գորակոչիկներին հետազոտության ուղեգրելու անհրաժեշտությունը:
14. Մինևույն ժամանակ շարունակվել է արձանագրվել հակառակ խնդիրը՝ որոշ բժշկական հաստատություններ հրաժարվում են հետազոտել առանց ուղեգրի ներկայացած 18 տարին լրացած արական սեռի քաղաքացիներին՝ վերջիններիս տարիքի և գորակոչիկ հանդիսանալու հանգամանքով պայմանավորված:
15. Չնայած ՀՀ կառավարության 2018 թվականի ապրիլի 12-ի N 405-Ն որոշման մեջ կատարված փոփոխություններով և լրացումներով սահմանվեց պահեստագործում հաշվառված քաղաքացիների բժշկական հետազոտությունների ցանկը, սակայն պահեստագործում հաշվառված անձինք հիմնականում չեն ենթարկվում համալիր

<sup>7</sup> <https://hcav.am/hcav-am-report-03-04-2023/>





բժշկական գննություններին վարժական հավանքներին ներգրավվելիս, ինչի արդյունքում ճանաչվում են՝ «ենթակա» վարժական հավանքներին մասնակցելու:

**2023 ԹՎԱԿԱՆԻ ԱՄԱՌԱՅԻՆ ԶՈՐԱԿՈՉԻ ԸՆԹԱՑՔՈՒՄ ԴԻՄԱԾ ՈՐՈՇ  
ԶՈՐԱԿՈՉԻԿՆԵՐԻ ԵՎ ՊԱՀԵՍՏԱԶՈՐՈՒՄ ՀԱՇՎԱՌՎԱԾ ԱՆՁԱՆՑ ԽՆԴԻՐՆԵՐԻ  
ՆԿԱՐԱԳՐՈՒԹՅՈՒՆՆԵՐԸ**

**1. Վ. Հ.**

2023 թվականի ամառային գորակոչի ընթացքում Կազմակերպությանը դիմած գորակոչիկ Վ. Հ.-ն, ինչպես նաև Հ. Ն.-ն, Ա. Պ.-ն, Հ. Կ.-ն, Ա. Ա.-ն, Ս. Պ.-ն, Ա. Գ.-ն, Վ. Թ.-ն, Կ. Ա.-ն և նա մեկ գորակոչիկ (անանուն) ունեն վերջույթների անոթների արյան շրջանառության խնդիրներ, որոնց կապակցությամբ գորակոչային բժշկական հանձնաժողովի կողմից ուղեգրվել են հետազոտությունների տարբեր բժշկական հաստատություններում:

Բոլոր վերը թվարկված գորակոչիկների մոտ ստորին և/կամ վերին վերջույթների արշան շրջանառության խանգարման խնդիրներն արտահայտվում են տարվա ցուրտ եղանակային պայմաններում, ուստի ամառային գորակոչի ընթացքում վերջիններիս նկատմամբ իրականացված հետազոտությունները չեն կարող արտացոլել գորակոչիկների առողջական վիճակի իրական պատկերը:

Զորակոչիկ Վ. Հ.-ին նախկինում 2 անգամ տրամադրվել է տարկետում նշված խնդրի կապակցությամբ, սակայն 2023 թ. ամառային գորակոչին նա նախ սահմանափակումով պիտանի է ճանաչվել զինվորական ծառայության համար, ապա իր միջոցներով անցած հետազոտությունները կենտրոնական բժշկական հանձնաժողովին ներկայացնելուց հետո միայն ուղեգրվել է լրացուցիչ բժշկական հետազոտությունների, որոնց արդյունքում գորակոչիկին տրամադրվել է տարկետում մինչև մեկ տարի ժամկետով:



## 2. Ա. Բ.

Զորակոչիկ Ա. Բ.-ին մինչև 2023 թվականի ամառային գորակոչը 2 անգամ տրամադրվել է տարկետում ՀՀ կառավարության 2018 թ. ապրիլի 12-ի N 404-Ն որոշման 20-րդ հոդվածի «դ» կետով (Ներգատիչ համակարգի և նյութափոխանակության հիվանդություններ՝ **գործառույթների ժամանակավոր խանգարումներով**), մինչդեռ 2023 թվականի ամառային գորակոչին վերջինս ճանաչվել է սահմանափակումով պիտանի զինվորական ծառայության համար նույն հոդվածի «գ» կետով (**գործառույթների աննշան արտահայտված խանգարում**):

Զորակոչիկը իր միջոցներով անցել է հետազոտություն, որի արդյունքների հիման վրա Կազմակերպությունը գրությամբ դիմել է ՀՀ պաշտպանության նախարարին՝ գորակոչիկին վերափորձաքննության ենթարկելու և զինվորական ծառայությանը վերջինիս պիտանիության մասին որոշումը վերանայելու հարցով:

Ստուգիչ փորձաքննության արդյունքում գորակոչիկին տրամադրվել է տարկետում մինչև մեկ տարի ժամկետով:

## 3. Կ. Ս.

Կազմակերպություն դիմած գորակոչիկ Կ. Ս.-ն, ով 2020 թվականին ամառային գորակոչին ճանաչվել էր ժամանակավորապես ոչ պիտանի զինվորական ծառայության համար ՀՀ կառավարության 2018 թ. ապրիլի 12-ի N 404-Ն որոշման նախկինում գործող կարգավորման 13-րդ հոդվածի «բ» կետով (զանգուղեղի և ողնուղեղի վնասվածքների հետևանքներ՝ **ֆունկցիաների չափավոր արտահայտված խանգարումով**), 2023 թ. ամառային գորակոչին ճանաչվել էր պիտանի զինվորական ծառայության համար:

Իր ֆինանսական միջոցներով անցած ՄՌԾ (MRT) հետազոտություն արդյունքներով գորակոչիկը ներկայացել է ԿԲՀ նիստին և ճանաչվել է ոչ պիտանի զինվորական ծառայության համար 2023 թ. ամառային գորակոչի ժամանակ:



#### 4. Ա. Ա.

Կազմակերպությանը դիմած գորակոչիկ Ա. Ա.-ն ուտքի բեկորային կոտորվածքի պատճառով ունի որսնաթաթի ծովածություն, ինչի պատճառով ուտքն այտուցում և ցավում է: Չնայած խնդիրն ակնհայտ է և այն կարել էր նկատել գորակոչիկի մարմնագննության ժամանակ, սակայն 2023 թ. ամառային գորակոչի ժամանակ գորակոչիկի ներկայացրած գանգատները հաշվի չեն առնվել, և վերջինս չի ուղեգրվել բժշկական հետազոտությունների նշված խնդրի կապակցությամբ: Թերի հետազոտությունների արդյունքում գորակոչիկը 2023 թ. ամառային գորակոչի վերջին օրերին ներկայացվելով ԿԲՀ նիստին՝ ճանաչվել է սահմանափակումով պիտանի զինվորական ծառայության համար: ԿԲՀ եզրակացության հետ անհամաձայնություն հայտնելուց հետո գորակոչիկին հայտնել են, որ նշված առողջական խնդրի լի հետազոտեն հաջորդ՝ 2023 թ. ձմեռային գորակոչի ժամանակ:

#### 5. Ա. Գ.

Ջորակոչիկ Ա. Գ.-ն 2023 թ. ամառային գորակոչի շրջանակներում չի ուղեգրվել բժշկական հետազոտությունների առողջական խնդիրների մի մասի՝ անոթային և նյարդային խնդիրների կապակցությամբ: Արդյունքում 2023 թ. ամառային գորակոչի վերջին օրերին գորակոչիկը, ներկայացվելով ԿԲՀ նիստին, ճանաչվել է պիտանի զինվորական ծառայության համար: ԿԲՀ եզրակացության հետ անհամաձայնություն հայտնելուց հետո գորակոչիկին հայտնել են, որ նշված առողջական խնդրի լի հետազոտեն հաջորդ՝ 2023 թ. ձմեռային գորակոչի ժամանակ:

***Փաստացի, գորակոչիկներին համալիր հետազոտությունների չենթարկելու և նրանց գանգատները հաշվի չառնելու հետևանքով վերջիններին գորակոչը հետաձգվում է:***

#### 6. Է. Ղ.

Ջորակոչիկ Է. Ղ.-ն ունի մի շարք առողջական խնդիրներ, որոնցից ոչ բոլորի կապակցությամբ է ուղեգրվել բժշկական հետազոտությունների: Արդյունքում նա ճանաչվել



Է պիտանի զինվորական ծառայության համար: Կազմակերպությունը դիմել է ՀՀ պաշտպանության նախարարությանը՝ մինչև զինվորական ծառայությանը պիտանիության մասին որոշում կայացնելը գորակոչիկին համալիր հետազոտությունների ուղեգրելու հարցով:

Արդյունքում ԿԲՀ որոշմամբ գորակոչիկին տրամադրվել է տարկետում մեկ տարի ժամկետով:

## 7. Մ. Ս.

Զորակոչիկ Մ. Ս.-ն ունի մի շարք առողջական խնդիրներ, այդ թվում՝ վերջույթների անոթների արյան շրջանառության, ոտնաթաթի ձևափոխման, ինչպես նաև նյարդային խնդիրներ: Զորակոչիկը հետազոտվել է առողջական խնդիրների միայն մի մասի կապակցությամբ: Զորակոչային բժշկական հանձնաժողովի բժիշկներից մեկը հայտնել է, որ եթե դրանց հիմքով Մ. Ս.-ն տարկետում չստանա, ապա նա կուղեգրվի հետազոտության նաև մյուս խնդիրների կապակցությամբ:

Բացի նշված խնդրից գորակոչիկը մի քանի անգամ դիմել է ԶԶՇՕ տարածքային ստորաբաժանում՝ ստանալու իր առողջական վիճակի հետազոտությունների վերաբերյալ ակտերի պատճենները, սակայն դրանք գորակոչիկին չեն տրամադրել:

Միայն գորակոչի ավարտից երեք օր առաջ գորակոչիկը կարողացել է ստանալ իր առողջական վիճակի հետազոտությունների վերաբերյալ ակտերի պատճենները և գործնականում ժամանակ չի ունեցել ծանոթանալ դրանց:

## 8. Է.Գ.

Զորակոչիկ Է.Գ.-ն ունի տեսողության խնդիր: Զորակոչիկն իր միջոցներով անցել է հետազոտություն, սակայն երկրորդ անգամ իր միջոցներով ստուգիչ հետազոտության ներկայանալով՝ տարբեր բուժհաստատություններում նրան հրաժարվել են հետազոտել,



պատճառաբանելով, որ գորակոչային տարիքի անձանց հետազոտություններն իրականացվում են միայն գորակոչային բժշկական հանձնաժողովի ուղեգրով:

### **Պահեստագործում հաշվառված անձ**

#### **9. Բ. Վ.**

Պահեստագործում հաշվառված Բ. Վ.-ն վարժական հավաքների կանչվելիս պետք է փորձաքննվեր ՀՀ կառավարության 2018 թ. ապրիլի 12-ի N 404-Ն որոշման 58-րդ հոդվածի («ամորձիների բացակայություն») «ա» կետով («երկու ամորձու տեղակայում որովայնի խոռոչում կամ բացակայությունը, **միակ ամորձի**»): Որոշման Հավելված N 1-ը իմպերատիվ ձևով սահմանում է, որ I, II, IV, V, VI սյունակներով փորձաքննվող անձինք ճանաչվում են ոչ պիտանի զինվորական ծառայության համար: Մինչդեռ 58-րդ հոդվածով փորձաքննվողների վերաբերյալ նշվում է 56-րդ հոդվածի բացատրական մասում, որտեղ սահմանվում է, որ «չորրորդ և հինգերորդ սյունակների համար կիրառվում է 58 հոդվածի «գ» կետը», այսինքն՝ անձինք պիտանի են զինվորական ծառայության համար: Ընդգծենք, որ ՀՀ կառավարության 2018 թվականի ապրիլի 12-ի N 404-Ն որոշման Հավելված 1-ով իմպերատիվ կերպով սահմանվում է, որ միակ ամորձու դեպքում անձինք, այդ թվում նաև չորրորդ և հինգերորդ սյունակներով փորձաքննվողները պետք է փորձաքննվեն միայն 58-րդ հոդվածի «ա» կետով և ոչ թե «գ» կետով: